

Uvod

Tokom 2018. godine, zabilježen je značajan priliv izbjeglica i migranata u Bosnu i Hercegovinu, sa preko 22 400 dolazaka evidentiranih od početka godine u poređenju sa 755 dolazaka 2017. godine.

Mnogi se pokušavaju kretati kroz Bosnu i Hercegovinu kako bi ušli na teritoriju EU prelaskom u Hrvatsku, ali mnogi i ostaju u zemlji. UNHCR, kao agencija UN-a za izbjeglice, procjenjuje da se u BiH od sredine novembra 2018. godine nalazi oko 6 000 ljudi.

Koje su potrebe?

U posljednjih nekoliko mjeseci, lokalne zajednice i međunarodne organizacije su pružale osnovnu pomoć, kao što su hrana, sklonište i osnovna zdravstvena zaštita. Međutim, njihovi kapaciteti su preopterećeni. U maju 2018. godine, Vijeće ministara Bosne i Hercegovine službeno je zatražilo pomoć od EU.

Dvije lokacije prihvata pod kontrolom vlasti imaju ograničene kapacitete i nalaze se daleko od migracijske rute. Zbog ograničenih kapaciteta za smještaj ugroženih i porodica, osiguranje adekvatnog smještaja i usluga je otežano. Razdvojena i djeca bez pratnje posebno su osjetljiva u tom smislu. Mnoge izbjeglice i migranti kampuju na otvorenom ili nalaze sklonište u napuštenim objektima u područjima na granici s Hrvatskom, sa ograničenim ili bez ikakvih sanitarnih objekata. Osiguranje odgovarajućeg smještaja je još i važnije u svjetlu predstojeće zime.

Na koji način pomažemo?

Od početka priliva izbjeglica i migranata u Bosni i Hercegovini, EU blisko saraduje s agencijama UN-a, drugim humanitarnim organizacijama i domaćim vlastima na zadovoljavanju humanitarnih potreba najranjivijih kategorija izbjeglica i migranata.

Europska unija je početkom juna 2018. godine osigurala 2 miliona eura hitne podrške za humanitarnu pomoć, a sredstva realiziraju međunarodne humanitarne organizacije. Ovakav hitni odgovor rješava potrebe izbjeglica i migranata prvenstveno na području Bihaća i Unsko-sanskog kantona na sjeverozapadu Bosne i Hercegovine gdje su potrebe najizraženije.

Pomoć obuhvata hranu, vodu, smještaj, sanitarni čvor, zdravstvenu pomoć, toplu odjeću i usluge zaštite. Dva vodeća partnera u provedbi su UNHCR, kao agencija UN-a za izbjeglice i Međunarodna organizacija za migracije (IOM) koja radi s nizom organizacija kao što su Dansko vijeće za izbjeglice (DRC), „Vaša prava“ i Fondacija „Bosanskohercegovačka inicijativa žena“. Kratkoročna pomoć nadopunjuje se srednjoročnim odgovorom u iznosu od 7,2 miliona eura, s ciljem osiguranja odgovarajućeg smještaja, osnovnih usluga i obrazovanja te jačanja domaćih kapaciteta za upravljanje migracijama.

Dodatni smještajni objekti nedavno su otvoreni u bihaćkoj regiji i u blizini Sarajeva kako bi se izbjeglicama i migrantima koji su prethodno živjeli u neadekvatnim uslovima ili na

improviziranim lokacijama mogla osigurati osnovna pomoć i sklonište od teških zimskih uslova.

EU provodi redovne konsultacije sa vlastima Bosne i Hercegovine o srednjoročnoj i dugoročnoj strategiji za rješavanje potreba izbjeglica i migranata.

Ažurirano

29/11/2018